

ZAKON O GRBU BOSNE I HERCEGOVINE

(Neslužbeni prečišćeni tekst¹)

Član 1.

Ovim zakonom se uređuje oblik i izgled grba Bosne i Hercegovine, kao i njegova upotreba od strane institucija Bosne i Hercegovine.

Član 2.

Grbom Bosne i Hercegovine predstavlja se Bosna i Hercegovina i grb se ističe kao simbol Bosne i Hercegovine.

Član 3.

Grb Bosne i Hercegovine se upotrebljava u skladu sa odredbama ovog zakona na način kojim se promovira ugled i dostojanstvo Bosne i Hercegovine.

Član 4.

Grb Bosne i Hercegovine je plave boje i u obliku štita sa zašiljenim završetkom. U gornjem desnom uglu štita nalazi se trokut žute boje. Paralelno lijevoj strani ovog trokuta proteže se red bijelih zvijezda petokraka.

Član 5.

Izgled i grafičko rješenje grba Bosne i Hercegovine su dati u Aneksu, koji čini sastavni dio ovog zakona.

Član 6.

1. Grb Bosne i Hercegovine ne može se upotrijebiti kao robni ili uslužni žig, uzorak ili model, niti kao bilo koji drugi znak za obilježavanje robe ili usluga.
2. Kada je to predviđeno posebnim propisima, grb Bosne i Hercegovine se može upotrebljavati kao sastavni dio drugih simbola ili obilježja.
3. Slobodna je upotreba grba Bosne i Hercegovine u umjetničke i obrazovne svrhe, pod uslovom da ne narušava ugled i dostojanstvo Bosne i Hercegovine.

Član 7.

Ministarstvo pravde Bosne i Hercegovine je nadležno za reguliranje proizvodnje grba Bosne i Hercegovine.

¹ Ovaj neslužbeni prečišćeni tekst sadrži: Zakon o grbu Bosne i Hercegovine ("Službeni glasnik BiH" broj 19/01); Zakon o izmjenama i dopunama Zakona o grbu Bosne i Hercegovine ("Službeni glasnik BiH" broj 23/04) - označeno **podebljanim slovima**.

Ovaj neslužbeni prečišćeni tekst služi za internu upotrebu i na njega se ne može pozivati prilikom službene upotrebe.

Član 8.

Grb Bosne i Hercegovine se ne može upotrebljavati na javnom mjestu ukoliko je oštećen ili svojim izgledom nepodoban za upotrebu i takav grb se povlači iz upotrebe.

Član 9.

1. Grb Bosne i Hercegovine se zvanično ističe i koristi na sljedeći način:

- a) na ulazima u sve zgrade Predsjedništva Bosne i Hercegovine, Vijeća ministara i **njegovih ministarstava**, Parlamentarne skupštine Bosne i Hercegovine, Ustavnog suda, **Suda Bosne i Hercegovine, Tužilaštva Bosne i Hercegovine**, Stalnog komiteta za vojna pitanja, Komisije za ljudska prava, Centralne banke i **Izborne komisije Bosne i Hercegovine**, kao i na ulazu u sve druge institucije Bosne i Hercegovine i druge institucije kojima ove institucije upravljaju;
- b) na zgradama svih ambasada i konzulata Bosne i Hercegovine;
- c) kao dio pečata Bosne i Hercegovine i u skladu sa Zakonom o pečatu Bosne i Hercegovine;
- d) u zvaničnoj prepisci, pozivnicama, vizit-kartama i sličnim dokumentima koja koriste članovi Predsjedništva, Vijeća ministara, ~~kopredsjedavajući i dopredsjedavajući~~, ministri i njihovi zamjenici, predsjednici skupštinskih domova Parlamenta Bosne i Hercegovine i njihovi zamjenici, te druge institucije Bosne i Hercegovine, kao što je napomenuto u stavu 1. a);
- e) na zvaničnim prijevoznim sredstvima koja koriste državni zvaničnici;
- f) na graničnim prijelazima Bosne i Hercegovine;
- g) na ulazima u objekte Oružanih snaga Bosne i Hercegovine.**

2. U svim slučajevima navedenim u prethodnom stavu, neće moći bit izložen nijedan drugačiji grb iz Bosne i Hercegovine zajedno sa ovim grbom Bosne i Hercegovine.

Član 10.

1. Upotreba grba Bosne i Hercegovine je dozvoljena:

- a) na zgradama gdje entitetska, kantonalna, gradska i općinska tijela, unutar Bosne i Hercegovine, imaju svoja sjedišta, kao i u ceremonijalnim prostorijama ovih zgrada;
- b) prilikom zvaničnih međunarodnih posjeta, takmičenja i drugih skupova (političkih, naučnih, kulturno-umjetničkih, sportskih i drugih) na kojima Bosna i Hercegovina učestvuje ili je predstavljena;
- c) u svim drugim slučajevima, sem ako je korištenje grba u suprotnosti sa ovim zakonom.

Član 11.

1. Kada je grb Bosne i Hercegovine izložen zajedno sa jednim ili više stranih grbova ili sličnih simbola, grb Bosne i Hercegovine bit će postavljen na počasno mjesto, kako slijedi:

- a) u središtu kruga gledano sprijeda, ako ostali grbovi obrazuju krug;
- b) u središtu polukruga gledano sprijeda, ako ostali grbovi obrazuju polukrug;

- c) na početku niza grbova, ako drugi grbovi obrazuju niz;
- d) na početku grupe drugih grbova, ako drugi grbovi obrazuju grupu.

Član 12.

Novčanom kaznom od 1.500 KM do 7.500 KM kaznit će se organ vlasti, privredno društvo ili drugo pravno lice, ako:

- 1. upotrijebi grb Bosne i Hercegovine u obliku i sadržaju suprotno odredbama čl. 3., 4. i 6. stav 2. Zakona,**
- 2. upotrijebi grb Bosne i Hercegovine kao robni ili uslužni žig, uzorak ili model ili kao drugi znak za obilježavanje robe i usluga (član 6. stav 1.),**
- 3. upotrijebi grb Bosne i Hercegovine suprotno uslovima iz člana 6. stav 3. Zakona,**
- 4. na javnom mjestu upotrijebi grb Bosne i Hercegovine koji je oštećen ili je svojim izgledom nepodoban za upotrebu (član 8.),**
- 5. ne upotrijebi, odnosno ne istakne grb Bosne i Hercegovine saglasno čl. 9. i 11. Zakona,**
- 6. upotrijebi, odnosno istakne grb Bosne i Hercegovine suprotno odredbama člana 10. Zakona.**

Za prekršaj iz stava 1. ovog člana kaznit će se i odgovorno lice u organu vlasti, privrednom društvu ili drugom pravnom licu novčanom kaznom od 300 KM do 750 KM.

Za prekršaj iz stava 1. ovog člana novčanom kaznom u iznosu od 300 KM do 750 KM kaznit će se lice koje samostalno obavlja privrednu djelatnost.

Za prekršaj iz stava 1. ovog člana tač. 1., 2., 3. i 4. kaznit će se građanin novčanom kaznom u iznosu od 100 KM do 400 KM.

Počiniocu prekršaja iz stava 1. ovog člana može se izreći i zaštitna mjera oduzimanja predmeta kojim je izvršen prekršaj.

Član 13.

Ovaj zakon stupa na snagu sedam dana nakon objavljivanja u "Službenom glasniku BiH".

("Službeni glasnik BiH" 23/04)

Član 4.

Ovaj zakon stupa na snagu osmog dana od dana objavljivanja u "Službenom glasniku BiH".